



**ბუღალტრული აღრიცხვის,
ანგარიშგებისა და აუდიტის
ზედამხედველობის სამსახური**

7 აპრილი 2025



N149330

ქ. თბილისი

ბ რ ძ ა ნ ე ბ ა

**„შპს „კამარა“-სთვის წერილობითი გაფრთხილების სახით პასუხისმგებლობის დაკისრების შესახებ“
ბუღალტრული აღრიცხვის, ანგარიშგებისა და აუდიტის ზედამხედველობის სამსახურის უფროსის 2024
წლის 25 დეკემბრის N 148693 ბრძანების ბათილად ცნობის თაობაზე**

ბუღალტრული აღრიცხვის, ანგარიშგებისა და აუდიტის ზედამხედველობის სამსახურის (შემდგომ - სამსახური) უფროსის 2024 წლის 25 დეკემბრის N 148693 ბრძანებით, შპს „კამარა“-ს (შემდგომ - სუბიექტი; ს/ნ 206247630, მისამართი: ქ. თბილისი, კრწანისის რაიონი, მარნეულის გზატკეცილი N 64) მიმართ მიღებულ იქნა ბრძანება წერილობითი გაფრთხილების სახით პასუხისმგებლობის დაკისრების თაობაზე, 2023 წლის საანგარიშგებო პერიოდის კონსოლიდირებული ანგარიშგების წარუდგენლობისთვის და დაევა ანგარიშგების ატვირთვის ჩანართში ჯგუფის ზომითი კატეგორიისთვის კანონით დადგენილი მოთხოვნების შესაბამისად, კონსოლიდირებული ანგარიშგების (კანონით დადგენილ შემთხვევაში აუდიტირებული კონსოლიდირებული ფინანსური და მმართველობის ანგარიშგება აუდიტორის მოსაზრებასთან ერთად, სრულად ერთ დოკუმენტში) ატვირთვა, ბრძანების გაცნობიდან 1 (ერთი) თვის ვადაში. სუბიექტი აღნიშნულ ბრძანებას ანგარიშგების ვებგვერდზე გაეცნო 2025 წლის 5 თებერვალს.

„ბუღალტრული აღრიცხვის ფინანსური ანგარიშგებისა და აუდიტის შესახებ“ საქართველოს კანონის (შემდგომში - კანონი) მე-9 მუხლის მე-2 და მე-4 პუნქტების თანახმად, „სუბიექტი (გარდა არასამეწარმეო (არაკომერციული) იურიდიული პირისა) ვალდებულია მისთვის ამ კანონით დადგენილი ფინანსური ანგარიშგება (მათ შორის, კონსოლიდირებული ანგარიშგება), მმართველობის ანგარიშგება (მათ შორის, კონსოლიდირებული ანგარიშგება), სახელმწიფოს მიმართ განხორციელებული გადახდების შესახებ ანგარიშგება და ამ კანონით გათვალისწინებულ შემთხვევებში აუდიტორული დასკვნა ერთად, დაუყოვნებლივ, მაგრამ არაუგვიანეს საანგარიშგებო პერიოდის მომდევნო წლის 1 ოქტომბრისა, წარუდგინოს სამსახურს მის მიერ დადგენილი წესით“. ასევე, „თუ სუბიექტის საანგარიშგებო პერიოდი არ ემთხვევა კალენდარულ წელს, იგი ვალდებულია სამსახურს წარუდგინოს ანგარიშგება მისი ხელმისაწვდომობისთანავე, დაუყოვნებლივ, მაგრამ საანგარიშგებო პერიოდის დასრულებიდან არაუგვიანეს 9 თვისა“.

კანონის მე-2 მუხლის პირველი პუნქტის „ც“ ქვეპუნქტის თანახმად, მშობელი საწარმო განმარტებულია, როგორც სუბიექტი, რომელიც ერთ ან რამდენიმე შვილობილ საწარმოს აკონტროლებს.

კანონის 26-ე მუხლის მე-4 პუნქტის საფუძველზე, „სამსახური სუბიექტის რისკების მართვის სისტემის საფუძველზე შეისწავლის. რისკების მართვის სისტემაში არსებული და საჯარო სამართლის იურიდიული პირის – შემოსავლების სამსახურის მიერ მიწოდებული ინფორმაციის ანალიზის საფუძველზე სამსახური იღებს სუბიექტისათვის პასუხისმგებლობის დაკისრების თაობაზე გადაწყვეტილებას“.

სამსახურის მიერ 2023 წლის საანგარიშგებო პერიოდის მიზნებისთვის სუბიექტის მიმართ სანქციების დაკისრების საფუძველს წარმოადგენდა რისკების მართვის სისტემაში დაფიქსირებული შემდეგი ფაქტობრივი გარემოება: შპს „კამარა“-ს შვილობილი საწარმოს - შპს „კამარა გრუპ“-ის (ს/კ 405045972) მიერ ანგარიშგების ვებგვერდზე წარდგენილ 2023 წლის საანგარიშგებო პერიოდის ანგარიშგებაში, სუბიექტი მითითებული იყო მშობელ საწარმოდ.

მიმდინარე წლის 18 მარტს ელექტრონული საკომუნიკაციო სისტემის საშუალებით სამსახურში შემოვიდა სუბიექტის მომართვა N-IYV51189AZF, სადაც აღნიშნული იყო, რომ შპს „კამარა“ 2023 წლის საანგარიშგებო პერიოდის მიზნებისთვის არ წარმოადგენდა მშობელ საწარმოს, რამდენადაც შპს „კამარა გრუპ“-ი მისი შვილობილი გახდა მხოლოდ 2024 წელს.

ადმინისტრაციული წარმოების ფარგლებში, სამსახურის მიერ გამოვლინდა და დადასტურდა მომართვაში მითითებული ფაქტობრივი გარემოება, რომ სუბიექტის მიმართ 2023 წლის საანგარიშგებო პერიოდის კონსოლიდირებული ფინანსური ანგარიშგების წარდგენის ვალდებულება არ არსებობს, რამდენადაც ის მშობელი საწარმო ნამდვილად გახდა 2024 წელს. აღნიშნული დასტურდება საჯარო სამართლის იურიდიული პირის - საჯარო რეესტრის ეროვნული სააგენტოს მეწარმეთა და არასამეწარმეო იურიდიული პირების რეესტრის ამონაწერებითაც (B22116269, 16/09/2022; B24071744, 11/06/2024).

საქართველოს ადმინისტრაციულ სამართალდარღვევათა კოდექსის მე-10 მუხლის შესაბამისად, „ადმინისტრაციულ სამართალდარღვევად (გადაცდომად) ჩაითვლება სახელმწიფო ან საზოგადოებრივი წესრიგის, საკუთრების, მოქალაქეთა უფლებებისა და თავისუფლებების, მმართველობის დადგენილი წესის ხელმოყვით მართლსაწინააღმდეგო, ბრალეული (განზრახი ან გაუფრთხილებელი) მოქმედება ან უმოქმედობა, რომლისთვისაც კანონმდებლობით გათვალისწინებულია ადმინისტრაციული პასუხისმგებლობა“. სამსახურმა დაადგინა, რომ კონკრეტულ შემთხვევაში სუბიექტის მიერ არ განხორციელებულა მართლსაწინააღმდეგო ქმედება.

საქართველოს ზოგადი ადმინისტრაციული კოდექსის (შემდგომ - კოდექსი) 60¹-ე მუხლის პირველი ნაწილის თანახმად, „ადმინისტრაციულ-სამართლებრივი აქტი ბათილია, თუ იგი ეწინააღმდეგება კანონს ან არსებითად დარღვეულია მისი მომზადების ან გამოცემის კანონმდებლობით დადგენილი სხვა მოთხოვნები“. ამავე მუხლის მე-3 და მე-7 ნაწილების თანახმად, „ადმინისტრაციულ-სამართლებრივ აქტს ბათილად ცნობს მისი გამომცემი ადმინისტრაციული ორგანო, ხოლო საჩივრის ან სარჩელის შემთხვევაში – ზემდგომი ადმინისტრაციული ორგანო ან სასამართლო“, ამასთან, „ადმინისტრაციული ორგანო ან სასამართლო ადმინისტრაციულ-სამართლებრივი აქტის ბათილად ცნობასთან ერთად განსაზღვრავს ადმინისტრაციულ-სამართლებრივი აქტის მოქმედების შეწყვეტის სამართლებრივ შედეგებს. შესაძლებელია განისაზღვროს ადმინისტრაციულ-სამართლებრივი აქტის მოქმედების შეწყვეტა მისი ძალაში შესვლის დღიდან“.

საქართველოს ადმინისტრაციულ სამართალდარღვევათა კოდექსის მე-10 მუხლისა და საქართველოს ზოგადი ადმინისტრაციული კოდექსის 60¹ მუხლის საფუძველზე,

ვ ბ რ ძ ა ნ ე ბ:

1. ბათილად იქნეს ცნობილი „შპს „კამარა“-სთვის წერილობით გაფრთხილების სახით პასუხისმგებლობის დაკისრების შესახებ“ ბუღალტრული აღრიცხვის, ანგარიშგებისა და აუდიტის

ზედამხედველობის სამსახურის უფროსის 2024 წლის 25 დეკემბრის N 148693 მისი ძალაში შესვლის დღიდან;

2. ბრძანება გაცნობიდან ერთი თვის ვადაში შეიძლება გასაჩივრდეს ბუღალტრული აღრიცხვის, ანგარიშგებისა და აუდიტის საბჭოში (მის: ქ.თბილისი, გორგასლის N16) ან თბილისის საქალაქო სასამართლოში (მის: ქ. თბილისი, დ. აღმაშენებლის ხეივანი N64).

დავით მჭედლიძე

სამსახურის უფროსი

ბუღალტრული აღრიცხვის, ანგარიშგებისა და აუდიტის ზედამხედველობის სამსახური

